

1 Kiinga

Tapitanya tjilpirringkula mirrirriku
1 Kiunga 1:5-10,15-18,32-40; 2:10,11

5-40 (1:5-10,15-18,32-40; 2:10,11) Tapitanya tjilpirrirra kunpu nyinanyingka, palumpa katja yurrunitja Yatunitjanya yunypa nyinangi, mayutju tiña nyinakitja, kanya Patjipalu kulinu, palumpa katja Tjalamunanya mayutju tiñalpi nyinanytjaku. Tapitalakutu ankula marrkunu, “Nyuntukunyuniñ yurrunpa watjanutjatjanungku Tjalamunanya mayutju tiña nyinatjurra!, Yatunitjanya mayutju tiña nyinatjipingkamarra.”

Tapitalu pulanya watjanu, tulku mayutju kutjarrangku Natjanalu anta Tjatakalu tjira Tjalamunangka katangka intira mayutju tinalpi nyinatjunkunytjaku. Tjatakalu Tjalamunanya mayutju tinalpi nyinatjunu. Tjilpi Tapitalu Tjalamunanya wangkarra nintiu, mayutju palya tjukarurru nyinanytjaku.

Palunyatjanu Tapitanya multunyarrirra ilungu. Tapitanya mayutju tiŋa tjanampa rawa nyinangi, yiya puutiyipala.

2

Tapitanya tjilpirringkula mirrirriku
1 Kiunga 1:5-10,15-18,32-40; 2:10,11

10-11 (1:5-10,15-18,32-40; 2:10,11) Tapitanya tjilpirrirra kunpu nyinanyingka, palumpa katja

yurrunitja Yatunitjanya yunypa nyinangi, mayutju tiṇa nyinakitja, kanya Patjipalu kuliṇu, palumpa katja Tjalamunanya mayutju tiṇalpi nyinanytjaku. Tapitalakutu ankula marrkuṇu, “Nyuntukunyuṇin yurrunpa watjanutjatjanungku Tjalamunanya mayutju tiṇa nyinatjurra!, Yatunitjanya mayutju tiṇa nyinatjipingkamarra.”

Tapitalu pulanya watjanu, tulku mayutju kutjarrangku Natjanalu anta Tjatakalu tjira Tjalamunangka katangka intira mayutju tiṇalpi nyinatjunkunytyaku. Tjatakalu Tjalamunanya mayutju tiṇalpi nyinatjunu. Tjilpi Tapitalu Tjalamunanya wangkarra nintiṇu, mayutju palya tjukarurru nyinanytjaku.

Palunyatjanu Tapitanya multunyarirra ilungu. Tapitanya mayutju tiṇa tjanampa rawa nyinangi, yiya puutiyipala.

Tjalamunanya mayutju tiṇa nyinamalpa

3

1 Kiinga 3:1-28; 4:20-34; 10:1-13

Tjalamunalu ninti nyinakitjangku tjapilku

1 Kiinga 3:1-15

¹⁻¹⁵ Tjalamunanya Katutjaku yunytjurrirra nyinangi. Palumpa paapangku watjanutjatjanungka kulira tjukarurru nyinangi.

Tjalamunanya anu tawunu Kipiyanalakutu, mungawinki Katutjaku tjawirrilyi pungkula tjunkukitjangku. Mungangka anku ngarrirra tjukurrmananyingka Katutjalu alatji tjapiṇu,

“Nyaakupan yunytjurringanyi?, ngayuluŋanta ungkunytjaku?” Tjalamunalu watjaŋu, “Nyuntu ngayuku paapaku puntura yulykarra nyinangi, palunyatjanunta tjukarurru nyinangi. Nyuntu Tapitaku tjukarurru palyara ngayunyaŋin Tapitaku katja ungu. Palunyatjanuna palumpa katja mayutju tiŋalpi nyinanyi. Ngayuluŋa yangupala ngurrpa nguwanpa mayutju tiŋalpiŋa tjanampa nyinanyi. Tjukarurru kanyilkitjana tjananya puŋu kuliltji pingka nintilaŋi! Nyuntuluŋin nintintjatjanungka kutjuna tjananya nyuntupa waltya yanangu tjuta, tjukarurru kanyilku. Wiyangka, puŋuna tjananya tjukarurru kanyilpayingkamarra.”

Alatji tjapintjala Katutjalu kulira Tjalamunuŋaku yunyparringu. Alatji watjaŋu, “Yunyparringanyiŋanta nyuntu manikamu yulytja tiŋaku tjapintjawiyangka, rawa kana nyinakitjangku tjapintjawiyangka. Panyapanin tjapintjala ngayuluŋanta puntura nintilku, ninti tiŋalpi nyuntu nyinanytjaku. Anangu kutjupa tjutaya nintiwiya nguwanpa nyinarra waŋinyi. Alatjitarraŋanta ungku mani anta yulytja tiŋa. Mayutju tiŋalpi nyuntu nyinamalpa, mayutju kutjupa tjutangka munkarra. Nyuntutjun ngayuku wangkaku yunytju kutu nyinanytjala, ngayuluŋanta kana kutu kanyilku. Rawa nyuntu nyinarra ngula kutju iluku.”

Katutjalu ilta panyapa watjaŋutjatjanungka yunyparringkula Tjarutjalumakutu ngaŋtikutu anu. Ankula Katutjaku pukutju palula puli wirulypa kutjarra ngarrinyingka paluru ngarala wal̄kuŋingi. Walkura tjawirrilyi pungkula

Katutjaku tjunu.

Tjalamanalu tjukarurru watjanmalpa
1 Kiinga 3:16-28

16-28 Waala kutjungka kungka kutjarra nyinangu. Ngurra palulakutu wati tjutaya ankula mani ungzula ngarrirra kuya palyalpayi kungka palunya kutjarrangka. Palunyatjanupula tjintu palunya kutjungka muti pakurringu. Palunyatjanupula tjintu palunya kutjungka iti, katja kutjarrapula utirringu, maama kutjarraku. Mungangka kungka kutjulu katja pulangkitingka karrpira ititjunkula palira iluntanu, kulintjawiyangku.

Mungangka kanarrirra ilungutja nyakula mantjira katirra kungka kutjupangka ngarritjunu, kungka paluru anku kutu ngarriyananyingka. Ngarritjunkula pipirri kutjupa kana ngarringitja mantjira, malaku katirra piita waltyjangka ngarritjunkula kanyira tjinturringu. Tjinturringuutjangka kungka kutjupangku pipirri mirri nyakula putu kulira ulangi. Putu ngurrkantankula kulinu, "Wiya pipirri mirri ngaatja ngayuku katja, kungka palaku." Ankula pipirri kutjupa nyakula kungka kutjupangka watjanu, "Mirri ngaatjanya nyuntupa katja, palatja ngayuku katja." Katja kana kanyilkitjapula pikarringu. Pikarrirrapula katingu mayutju tiña Tjalamanalakutu.

Tjalamanalu kulinjingitjangka pipirri mulyatangku mantjinutjatjanu watjanu ara palunya. Palunyatjanu kungka paluru ngunytjilyinu, "Pipirri kana ngaatjanya

ngayukutju, mulyatangkutjun mantjingu.” Kanya kungka kutjupangku watjañu, “Wiya, pipirri kana ngaatjanya ngayuku, nyuntupa ilungu.” Tjalamunala kurungka pipirritjirratjangku alatjingkupula ngaparrku watjara pungu. Palunyatjanu Tjalamunalu waarrkana wantirriyañu tjuula waławara mantjira ngalya katintjaku. Tjuula waławara ngalya katirra ngarala kanyiñgingitjangka Tjalamunalu alatji watjañu, “Pipirri kana palunya nguruwananña kuntara kilytjuntanku. Ngururrpa kilytjuntara kuntara yangkirrpa kutjupara yuwa!, kungka kutjupaku. Yangkirrpa kutjupa kungka kutjupaku yuwa!” Kuntara kilytjuntankukitjalu watjañutjangka kungka paluru katjatjirratjalu marrkuñu, pipirriku maamalu, “Mayutju. Kuntara kilytjuntankunytjawiyalu kungka palakura yuwa!” Paluru kungka kutjupangku watjañu, “Ngayunya kutjuni kana yungkunytjawiya, kuntara kilytjuntankula ngaparrtji kutjarralinyatju yuwa!”

Paluru Tjalamunalu watjañu, “Kuntara kilytjuntankunytjawiyangku, kungka palakura yuwa!, maama palumpa walytjaku.” Tjalamunaku waarrkana tjutangku wangka palunya kulira yunyparrirra yanangu tjutangka tjakultjurinangi. Anangu tjutaya kulira yunyparringu. Tjalamunanya alatji pulkapungu, “Yilta mayutju tiñalampa ninti tiña nyinanyi. Tjukarurrungku kulira ngurrkantankula malaku mantjira yungkupayi, yungu kungka maama walytjaku.”

4

*Tjalamunanya ninti punturrirra yulytja
tinatjarra nyinamalpa*

1 Kiunga 4:20-34; 10:1-13

20-34 (4:20-34; 10:1-13) Tjalamunaku waarrkana tjutalingku nyinangu. Waarrkana kutjupa tuwalpala tjananya Tjalamunalu mayutju tjuṭa nyinatjunu, ngurra kutjupa kutjupangkaya nyinanytjaku. Mayikamu kuka tjananya yaŋangu tjutangka mantjira katipayi, mayutju Tjalamunaku, ngurra Tjarutjalumalakutu.

Tjalamunalu tjananya tjukarurru kanyiŋingitjangka, Yitjurilaku walytja nganṭitja tjuṭa yunypa nyinarra waŋingi mayikamu kukaku puṭu kulintjawiya. Tjalamunaku waarrkana mingaya nyinarra waŋingi. Kutjupa ngurrara tjutatarra tjanampa Tjalamunanya mayutju tiṇa nyinangi, karlu Yupurititjalakutu maa nyinarra waŋinytja tjutaku, Pilitjiyanya ngurrara tjutakutarra, paṇa Yitjipilakutu maa nyinarra waŋinytja tjutakutarra. Tjutangkuya mayutju Tjalamunaku mani yulytjaṭarra ngurrtjara yungkula nyinapayi.

Palunyatjanu Tjalamunanya manikamu yulytja tinatjarra nyinangi, mayikamu kuka tinatjarra. Ninti tiṇangku piipangka yara wakalpayi, tulku tjuṭa nintilkitjangku, warrantjakuya. Yukiri yuwankarraku Tjalamunanya nintilingku nyinapayi. Kuka paṇangka nyinanytja tjutaku, tjulpu tjutaku, kuka yuru ngurrara tjutaku, yuwankarraku Tjalamunanya ninti nyinapayi. Kutjupa kutjupa

ngurrara tjutangku Tjalamunanya nintilingku nyinanytjala tjakulpa kulira ngalyankula yunypangku kulilpayi.

Tjiipanya ngurrara tjutaku mayutju tiña kungka nyinapayi. Paluru tjakulpa kulira ngalyanu Tjarutjalumalakutu Tjalamunanya nyakula kulilkitcha. Tjalamunangka ngarala wangka marrka puntu kulintjatjanungku tjapiñu. Tjalamunalu wangka palunya tjuta kulira tjukarurrungku nintiñingi. Kungka Tjiipanya ngurrarangku kulira yunyparringu. Waala tiña Tjalamunaku ngurra ngarangu palumpa mani puntu ngarripayi. Pulì kuulta tiña, pulì tjiilpa tiña ngarripayi. Palumpa mayi tiña ngarringi, palumpa yulytja tiñatarra. Yalatji kungka paluru nyakula yunyparringu Tjalamunala alatji watjanu, “Nyuntu ninti tiñangku tjananya tjukarurru watjara kanyini. Iltaya nyuntupa walytja tjuta nyuntupa waarrkana tjutatarra yunypaya palya nyinanyi. Ilta nyuntupa mayutju tiñangku Katutjalunta yunypa nyinarra mayutju tiña nyinatjunu, Yitjurilaku walytja ngantitja tjutaku.” Kungka mayutju paluru Tjalamunanya inytjanungku yungu, pulì kuulta, pulì tiilyka tjuta, ngurutja tjuta. Tjalamunalu ngaparrtjilu yulytja tiñara yungu, kungka paluru tjapiningitjangka. Kungka paluru, palumpa waarrkana tjutangku tarra yulytja tjuta kamula tjutangka yutitjunkula ngurra walytjakutu malaku katingu.

Tjalamunalu Katutjaku tjaatji

tiṇa palyalku

5

1 Kiinga 5:1—8:66

Pulikamu watiya tjana mantjilku palyalkit-jangku

1 Kiinga 5:1-18

1-18 Tjalamunalu tjananya waarrkana maṇkurra iyanu tawunu Taayalakutu. Paluny ngurrara tjutaku mayutju yini Yaramanya nyinangi. Tjalamunalu tjananya iyanu mayutju palula yalatji tjakultjunkunytjaku, “Ngayuku paapa Tapitanya yunytjurringu mayutju Katutjaku tjaatji tina palyalkitja. Yalatjikun ninti nyinanyi. Tapitalu tjananya tjilirratjarra tjuta tjuṭangara pikakutu katipayi. Rawangkuya pikangku pungkupayi, kutjupa tjuṭa. Kuwarriya ngurra kutjupa ngurrara tjutangkuya wiya pikangkulanyatjuya pungkukitja unytjurringanyi. Pikawiyalatju nyinanyi. Mayutju Katutjalu tjananya kuwarri pikawiyaku marrkuṇu. Palunyatjanuṇa unytjurringanyi Katutjaku tjaatji tiṇa palyalkitja. Nyuntupa waarrkana tjuta tjananya wantirriyalal!, ngurra Lipananalakutu, watiya tiimpa luutuya atura ngalya katinytjaku, Tjarutjalumalakutu. Tjungungkuya ngayuku waarrkana tjuṭangku watiya tiimpa atura ngalya katimalpa. Nyuntupa waarrkana tjuṭa ngayuluṇa tjananya wayitjimaningka payimilalku. Watjalani! Wayitjimani yaalytjirri ngayulu tjananya yungku?” Yaramalu yara palunyu kulira

yunyparringu. Palunyatjanu Tjalamunaku waarrkana tjutangku Yaramaku waarrkana tjutangkutarra tjananya watiya tiimpa atura luutu ngalya katipayi, Tjarutjalumakutu tjaatji palyalkitjangku.

Tjalamunaku waarrkana kutjupa tjutangkuya puli walutjanu kilytjukatingutja ngalya katipayi, tjaatji tiña palyalkitjangku.

6

Tjaatji tinaya palyanmalpa Katutjaku

1 Kiunga 6:1—7:51

1-38 (6:1—7:51) Yitjurilaku walytja ngantitja tjuta paña Yitjipingka nyinanytjatjanu rawa nyinangi paña Kayinanangka, yiya yantaña puupalakamu yiya yiitiyipala. Palunyatjanu Tjalamunaku waarrkana tjutangkuya Katutjaku tjaatji tiña palyalkitjangku puli walu tjuta ngalya katirra ngarritjunkupayi. Kutjupa tjutangkuya puli panyapa tjuta mantjira rawangkuya tjaatji palyaningga, yiya tjapanpalangka. Tjaatji tiña katuya palyaningga. Tjaatji palula yila wiwaya yilipitjarrangku watiya atulpayi. Palunya nguwanpa wiwaya yamatjarrangku puli atura wirulymankupayi, wañma kutjuya atura wirulymara ngalya katipayi. Watiya tjutatarraya wañma yilipitjarrangku atura ngalya katipayi tjaatji palyalkitjangku.

Tjaatji waalangka ilatu ilatuya tjunkula wanañgingi puli tjuta, kalparra tuuwa mañkurrwana tjarrpanytjaku.

Waala tiña unnguwanaya ruuma kutjarra palyaŋu, Katutjaku ngurra ngaranytjaku, ruuma kutju palula Katutjaku pukutju puļi wirulypa kutjarratjarra ngaranytjaku.

Tjaatji tiña palunyangkaya unnguya kuulta pangki nguwanpaya palyara nganytjatjura wanaŋu.

Yayina nguwanpa warungka tjunkula kanilpangka kapi kapirringutja pitingka tjuṭangara tjutira yatjikingku palyaningga tayingka tiña, tjaatjingka yurilpangka kapitjarra ngaranytjaku.

Palunyatjanuya tayingka wiima tjiilpangkaya palyaŋu, wakinangka ngarayinkupayi tiinpala. Kuka tjawirriliyi paltjintjakuya wakina ngaratjunkupayi, tjaatjingka ila yurilta. Yulytja kutjupa tjuṭarraya yatjikingku palyara tjaatji tiñangka ngaratjunu.

7

Tjaatji tinaya palyanmalpa Katutjaku 1 Kiunga 6:1—7:51

1-51 (6:1—7:51) Yitjurilaku walytja ngantitja tjuṭa paña Yitjipingka nyinanytjatjanu rawa nyinangi paña Kayinanangka, yiya yantata puupalakamu yiya yiitiyipala. Palunyatjanu Tjalamunaku waarrkana tjuṭangkuya Katutjaku tjaatji tiña palyalkitjangku puļi walu tjuṭa ngalya katirra ngarritjunkupayi. Kutjupa tjuṭangkuya puļi panyapa tjuṭa mantjira rawangkuya tjaatji palyaningga, yiya tjapanpalangka. Tjaatji tiña katuya palyaningga. Tjaatji palula yila wiyaya yilipitjarrangku watiya atulpayi. Palunya

nguwanpa wiyaya yamatjarrangku puli atura wirulymankupayi, wañma kutjuya atura wirulymara ngalya katipayi. Watiya tjutañarraya wañma yilipitjarrangku atura ngalya katipayi tjaatji palyalkitjangku.

Tjaatji waalangka ilatu ilatuya tjunkula wanañingi puli tjuta, kalparra tuuwa mankurrwana tjarrpanytjaku.

Waala tiña unnguwanaya ruuma kutjarra palyañu, Katutjaku ngurra ngaranytjaku, ruuma kutju palula Katutjaku pukutju puli wirulypa kutjarratjarra ngaranytjaku.

Tjaatji tiña palunyangkaya unnguya kuulta pangki nguwanpaya palyara nganytjatjura wanañu.

Yayina nguwanpa warungka tjunkula kanilpangka kapi kapirringutja pitingka tjutangara tjutira yatjikingku palyañingi tayingka tiña, tjaatjingka yurilpangka kapitjarra ngaranytjaku.

Palunyatjanuya tayingka wiima tjiilpangkaya palyañu, wakinangka ngarayinkupayi tiinpala. Kuka tjawirriliyi paltjintjakuya wakina ngaratjunkupayi, tjaatjingka ila yurilta. Yulytja kutjupa tjutañarraya yatjikingku palyara tjaatji tiñangka ngaratjunu.

8

Tjaatji tiña ngaranyingka Katutjanyaya tjapira pulkapungku

1 Kiinga 8:1-66

¹⁻⁶⁶ Yitjurilaku walytja ngañtitja tjutaku mayutju tjuña tjananya Tjalamunalu yaltingu

tjaatji tiñangka tjungurrinytjaku. Altingu tjananya ngalyankula tjungulu nyakula wanantjaku, Katutjaku pukutjuya tjaatji tiñakutu maa katinyingka. Tulku mayutju tjutangkuya katirra katura tjarrpatjunkula tjunu. Tuulparrangka ngantiya Tjarutjalumangka yalatji tjungurringu. Tulku mayutju tjutangkuya alatji Katutjaku pukutju riilatjarrangku katirra, kalparra tjaatji tinangka tjunu, Katutjaku ngurrangka.

Lipayiku walytja ngantitja tjutangku tjaatji tina palula yulytja tjuta tjunkula wantingu. Alatjiya Katutjaku pukutjutarra katirra kalparra tjaatji tiñangka tjunu, kutjupa tjutangkuya kuka tjawirrilyi tjutalingku pungkula kutjalpayi. Pukutju palunyaya tjunkula małaku ankula wirrkanutjangka Katutjaku ngangkalì unngu ngarala yirrnyanìngi, Katutjanya ngalyankula tjaatji yunngu nyinanyingka. Palunyatjanuya tulku mayutju tjutangku waarrka palyalkitja puťu tjarrpangu, ngangkalingku anganitingjangka.

Anangu tjutaya tjaatji tinangka kalkuni ngarala wañinyingka, Tjalamunalu anangu tjuta tjananya tjakultjunu tjaatji pulka palyantjaku Katutjalu Tapitanya watjañutjangka. Palunyatjanu tjanala Tjalamunalu watjanu, “Kuwarri nganana yunyparringanyi, tjaatji ngaatja ngaranyingka.”

Tjawirrilyi kutjalpayikutu yankula ngarala Tjalamunalu Katutjanya pulkapungkula rawangku tjapiningi paluru tjanala nintira yanťayanťantjaku.

Palunyatjanuya Tjalamunalungarri kuka tjawirrilyi tjutalingku ngalya katingu, waan yantaṭan puutiyi tuu tjawutjuna Katutjaku pungkula kutjantjaku, kutjalpayi palula.

Palunyatjanuya Katutjaku tulku tjin̄tu tjapanpalangara nyinarra warralpayi. Palunyatjanuya yunypalpiya yankula wañingu ngurrakutu.

10

Tjalamunanya ninti punturirra yulytja tinatjarra nyinamalpa

1 Kiinga 4:20-34; 10:1-13

1-13 (4:20-34; 10:1-13) Tjalamunaku waarrkana tjutalingku nyinangu. Waarrkana kutjupa tuwalpala tjananya Tjalamunalu mayutju tjuta nyinatjunu, ngurra kutjupa kutjupangkaya nyinanytjaku. Mayikamu kuka tjananya yañangu tjutangka mantjira katipayi, mayutju Tjalamunaku, ngurra Tjarutjalumalakutu.

Tjalamunalu tjananya tjukarurru kanyiñgingitjangka, Yitjurilaku walytja ngan̄titja tjuta yunypa nyinarra wañingi mayikukamu kukaku putu kulintjawiya. Tjalamunaku waarrkana mingaya nyinarra wañingi. Kutjupa ngurrara tjutatarra tjanampa Tjalamunanya mayutju tiña nyinangi, karru Yupuritijalakutu maa nyinarra wañinytja tjutaku, Pilitjiyanya ngurrara tjutakutarra, paña Yitjipilakutu maa nyinarra wañinytja tjutakutarra. Tjutangkuya mayutju Tjalamunaku mani yulytjaṭtarra ngurrtjara yungkula nyinapayi.

Palunyatjanu Tjalamunanya manikamu yulytja tiñatjarra nyinangi, mayikamu kuka tiñatjarra. Ninti tiñangku piipangka yara wakalpayi, tulku tjuṭa nintilkitjangku, warrantjakuya. Yukiri yuwankarraku Tjalamunanya nintilingku nyinapayi. Kuka pañangka nyinanytja tjuṭaku, tjułpu tjuṭaku, kuka yuru ngurrara tjuṭaku, yuwankarraku Tjalamunanya ninti nyinapayi. Kutjupa kutjupa ngurrara tjuṭangku Tjalamunanya nintilingku nyinanytjala tjakulpa kulira ngalyankula yunypangku kulilpayi.

Tjiipanya ngurrara tjuṭaku mayutju tiña kungka nyinapayi. Paluru tjakulpa kulira ngalyanu Tjarutjalumalakutu Tjalamunanya nyakula kulilkita. Tjalamunangka ngarala wangka marrka puntu kulintjatjanungku tjiapiṇu. Tjalamunaļu wangka palunya tjuṭa kulira tjukarurrungru nintiñingi. Kungka Tjiipanya ngurrarangku kulira yunyparringu. Waala tiña Tjalamunaku ngurra ngarangu palumpa mani puntu ngarripayi. Puli kuulta tiña, puli tjiilpa tiña ngarripayi. Palumpa mayi tiña ngarringi, palumpa yulytja tiñatjarra. Yalatji kungka paluru nyakula yunyparringu Tjalamunala alatji watjaňu, “Nyuntu ninti tiñangku tjananya tjukarurru watjara kanyini. Iltaya nyuntupa walytja tjuṭa nyuntupa waarrkana tjutařarra yunypaya palya nyinanyi. Ilta nyuntupa mayutju tiña nyinatjunu, Yitjurilaku walytja ngantitja tjuṭaku.” Kungka mayutju paluru

Tjalamunanya inytjanungku yungu, puli kuulta, puli tiilyka tjuta, ngurutja tjuta. Tjalamunalu ngaparrtjilu yulytja tinara yungu, kungka paluru tjapiningitjangka. Kungka paluru, palumpa waarrkana tjutangkutarra yulytja tjuta kamula tjutangka yutitjunkula ngurra walytjakutu malaku katingu.

Yitjurilaku walytja nganṭitja tjuta kaputu kutjarra nyinamalpa

11

1 Kiinga 11:1—14:20

Tjalamunalu kuya palyara wiyarrikupi
1 Kiinga 11:1-13,29-33,41-43

¹⁻⁴³ (1-13,29,30,31,32,33,41,42,43) Tjalamunanya miita tjuta yunytjurringkupayi. Kungka kutjupa kutjupa ngurrara tjuta tjananya yaltirra kanyiningi. Kungka yalatji ngurrara tjuta tjananya yaltirra kanyiningi, Yitjipinya ngurrara tjuta, Yitatunya ngurrara tjuta, Muwapanya ngurrara tjuta, Yamananya ngurrara tjuta, Yiitumanya ngurrara tjuta, Tjayitananya ngurrara tjuta. Kungka yalatji ngurrara tjutalingku waan tjawutjuna Tjalamunalu yaltirra kanyiningi, Katutjaku wangka wantirra. Katutjalu yurrunpa watjanu Yitjurilaku walytja kutju altirra kanyintjaku, kungka kutjupa kutjupa ngurrara wiya. Palumpa wangka kulintjawiyangku Tjalamunalu paluru tjananya

ngurra kutjupa kutjupa ngurrara yaltirra kanyiñingi. Kungka tjutangkuya Tjalamunanya tjingapungkupayi Katutjanya nguwanpa kutjupa tjuta pulkapungkunytjaku. Palunyatjanu Tjalamunalulpi tjananya Katutjanya nguwanpa kutjupa tjutalpi pulkapungkula nyinangi. Yalatji tjuta pulkapungkuyananyingka Katutjalu kutjarrangara Tjalamunanya putu marrkuñu. Palunyatjanu Katutjalu Tjalamunanya alatjingku watjañu, “Nyuntu tjananya kutu wiyanangku pulkapungkuyananyingka nyuntupa waarrkanalpina mayutju tiña nyinatjunku, nyuntupa katja wiya. Nyuntupa waarrkanalpi tjanampa Yitjurilaku waltyja ngantitja tjutaku mayutju tiña nyinaku, nyuntu wiyarringanyingka.”

Tjalamunaku waarrkana yini Tjiripumanya waarrka parrpañu parrpañu palyalpayi nyinangi. Palunyangka Tjalamunalu kulira Tjiripumanya mayutju tjanampa nyinatjunu waarrkana kutjupa tjutaku. Tjiripumanya Tjarutjalumalanguru yiwarrawana yananyingka, Katutjaku wangka watjalpayi Yayatjanya tjungurringu. Tjungurrirra Yayatjalu kuuta wañawara waltyja yirriwiltjinu palunyatjanu paluru dintarrpungkula kilytjunpa tuwalpala palyañu. Tuwalpala palunya marangku kanyira watjañu, Tjiripumalu kilytjunpa tiinpala mantjira kanyintjaku. Tjiripumalakutu alatji Katutjaku wangka tjakultjunu, “Tjalamunaluñi Katutjanya wantingutjangka palumpa katja wiya Yitjurilaku waltyja ngantitja tjutaku mayutju tiña nyinaku, mañkurr mañkurrpaku mayutju

nyinaku. Nyuntulpi mayutju tiṇa tjanampa Yitjurilaku walytja nganṭitja tjutaku nyinaku, walytjararranpa tiinpalaku. Ngayuluṇanta nyinatjunku, nyuntu mayutju tiṇa tjanampa nyinanytjaku.”

Palunyatjanu Tjalamunanya nyinarra wiyarringu mayutju tiṇa tjanampa rawa nyinarra, yiiya puutiyipala. Palumpa katja Riyapumanya mayutju tiṇalpi nyinangu Yitjurilaku walytja nganṭitja tjutaku, maṇkurr maṇkurrpaku.

12

Ngalytja kutjarrarirraya mayutju kutjarrat-jarra nyinamalpa

1 Kiinga 12:1-20

1-20 Tjalamunanya wiyarringutjangka tjakulpa kulira Tjiripumanya paṇa Yitjipingka nyinarra malaku yanu. Tjiripumanya altirra Yitjurilaku walytja nganṭitja tjuta, yalintjarra ngurrara tjuta ngurra Tjikimangka tjungurringuya, Tjalamunaku katja Riyapumaku mirrpaṇarrirra. Palunyatjanuya Riyapumanya yalatji watjanu, “Nyuntupa paapa Tjalamunanyalampatju mayutju ngurrkunytju nyinangi, punturalanyatju tjingapungkupayi waarrkarrinytjaku. Putulatju nyinarra kulilpayi waarrka tiṇangka. Wiyalatju yunytjurringanyi palunya nguwanpa waarrkarrinytjaku. Tjapinilatjunta nyuntu tjukarurrulanyatju kanyintjaku waarrka wiima nguwanpa yungkunytjaku.”

Tapitaku ngalungku tjutangkuya, tjilpi tjutangku Riyapumanya tjingapungu, “Palyantaya panyapa tjapiñu, kuyarrinytjawiyangku tjananya mayutjungku kanyinma!” Ka Riyapumaku malpa tjutangkuya yangupala tjutangku alatji tjingapungu, “Wiya. Nyuntu tjanampa mayutju mulyarranytju tjananya kanyintjaku, punturaya waarrkarrinytjaku.” Palunyangka tjananya Riyapumalu aŋangu tjuta tjingapungu puntura waarrkarrinytjaku. Palunyatjanuraya Riyapumaku ngurrkurriirra yalatjiyanku wangkangi, “Riyapumanya wiya mayutjulampa nyinaku. Wantirralaka yalinytjarra yarra!, paluru mayutju kuya, waarrka tiña yungkupayi. Wiyalanya tjukarurrungku kanyini.”

Alatjiya Yitjurilaku walytja ngan̄titja tjutangku yalinytjarra ngurrara tjutangku mayutju Riyapumanya panypurangkula wantikatingu. Palunyatjanu tjanampa Tjuutaku ngan̄titja tjutaku kutju yulparirra ngurrara tjutaku Riyapumanya mayutju tiña nyinangi, ngurra Tjarutjalumala. Yalatjiya Yitjurilaku walytja ngan̄titja tjuta, yalinytjarra ngurrara tjuta tjanampa yulparirra ngurrara tjutaku kuyarrirra nyinangi. Riyapumanya wantirraya mayutju tiña kutjupa Tjiripumanyalpi nyinatjunu.

Tjiripumalu Katutjanya nguwanpa palyara pulkapungamalpa
1 Kiunga 12:25-33; 13:33,34

25-33 (12:25-33; 13:33,34) Tjiripumanya, palumpa waarrkana tjuta^tarraya tawunu Tjikimangka nyinangi. Palunyatjanuya tawunu Pinulangka ankula nyinangi. Nyinarra Tjiripumalu kuli^u, “Ngayku waarrkana tjutaya mayutju Katutjanya tjawirrili^y yungkukitja, wiya Tjarutjalumalakutu ankunytjaku. Tjinguruya Katutjanya walkulkitja tjaatji tiⁿakutu ankula mayutju Riyapumaku ngulytjurriku, ngulytjurrirraⁿya ngalya yankula mirri pungkutjipingka. Yalatjingkamarra Katutjanya nguwanpa ngaangkalpi kutjarraⁿa palyara ngaratjunku, ngurra Tjarutjalumalakutu tjaatji tiⁿakutu yaⁿangu tju^ta ankupayingkamarra.” Panyapa kulira Tjiripumalu puluka wiima kutjarra nguwanpa palyara ngaratjunu. Kutjupa, ngurra Pitjilta ngaratjunu, kutjupa ngurra Taanangka katirra ngaratjunu. Yaⁿangu tju^ta tjananya Tjiripumalu alatji tjingapungu, “Rawala Tjarutjalumalakutu ankula pu^lkapungkupayi. Alatjingkamarra ngaangkalpila puluka wiima kutjarra pu^lkapungkunytjaku. Puluka paluru tjananya yirriti nyinapayi tju^ta Yitjipingka pakaltjingara ngalya katingu, mayutju tiⁿangku.”

Palunyatjanuya Yitjurilaku walytja ngantitja tju^tangku alinytjarra ngurrara tju^tangku Katutjanya nguwanpa puluka wiima kutjarra pu^lkapungkula nyinangi. Yiwarra kutjupawanangku tjananya paluru tjingapungkula kuyaⁿu. Puluka palula kutjarrawana waarrkarrinytjaku tjananya ngaratjunu tul^kuku

mayutju kutjupa tjuṭa, Tjiripumalu. Paluru tjanaya kuka tjawirrilyi pungkula kutjara puluka pulkapungkupayi. Tjiripumaluṭarra tulku mayutju nguwanpangku tjawirrilyi pungkula kutjalpayi, puluka pulkapungkukitjangku.

Lipayiku walytja nganṭitja kulintjawiyangku Tjiripumalu kutjupa tjuṭa tulku mayutju tjuṭa nyinatjunu. Yanangu Lipayiku walytjawiyangku tulku mayutju nyinakitja yunytjurirra tjapiñingka, Tjiripumalu nyinatjunkupayi. Lipayiku walytja nganṭitja tjuṭa watı tjuṭa kutju tjanaya tulku mayutju paluru nyinatjunamara, Muutjalu irriṭi watjanutjangka.

13

Tjiripumalu Katutjanya nguwanpa palyara pulkapungamalpa

1 Kiinga 12:25-33; 13:33,34

³³⁻³⁴ (12:25-33; 13:33,34) Tjiripumanya, palumpa waarrkana tjuṭatarraya tawunu Tjikimangka nyinangi. Palunyatjanuya tawunu Pinulangka ankula nyinangi. Nyinarra Tjiripumalu kuliṇu, “Ngayuku waarrkana tjutaya mayutju Katutjanya tjawirrilyi yungkukitja, wiya Tjarutjalumalakutu ankunytjaku. Tjinguruya Katutjanya walkulkitja tjaatji tiṇakutu ankula mayutju Riyapumaku ngulytjurriku, ngulytjurrirraṇiya ngalya yankula mirri pungkutjipingka. Yalatjingkamarra Katutjanya nguwanpa ngaangkalpi kutjarraṇa palyara ngaratjunku, ngurra Tjarutjalumalakutu tjaatji tiṇakutu

yanangu tjuta ankupayingkamarra.” Panyapa kulira Tjiripumalu puluka wiima kutjarra nguwanpa palyara ngaratjunu. Kutjupa, ngurra Pitjilta ngaratjunu, kutjupa ngurra Taanangka katirra ngaratjunu. Yanangu tjuta tjananya Tjiripumalu alatji tjingapungu, “Rawala Tjarutjalumalakutu ankula pulkapungkupayi. Alatjingkamarra ngaangkalpila puluka wiima kutjarra pulkapungkunytjaku. Puluka paluru tjananya yirriti nyinapayi tjuta Yitjipingka pakaltjingara ngalya katingu, mayutju tinangku.”

Palunyatjanuya Yitjurilaku walytja ngantitja tjutangku alintjarra ngurrara tjutangku Katutjanya nguwanpa puluka wiima kutjarra pulkapungkula nyinangi. Yiwarra kutjupawanangku tjananya paluru tjingapungkula kuyaŋu. Puluka palula kutjarrawana waarrkarrinytjaku tjananya ngaratjunu tulku mayutju kutjupa tjuta, Tjiripumalu. Paluru tjanaya kuka tjawirriliyti pungkula kutjara puluka pulkapungkupayi. Tjiripumalutarra tulku mayutju nguwanpangku tjawirriliyti pungkula kutjalpayi, puluka pulkapungkukitjangku.

Lipayiku walytja ngantitja kulintjawiyangku Tjiripumalu kutjupa tjuta tulku mayutju tjuta nyinatjunu. Yanangu Lipayiku walytjawiyangku tulku mayutju nyinakitja yuntjurrirra tjapiñingka, Tjiripumalu nyinatjunkupayi. Lipayiku walytja ngantitja tjuta wati tjuta kutju tjananya tulku mayutju paluru nyinatjunamara, Muutjalu irri ti watjanutjangka.

14

*Katutjanya Tjiripumaku mulyarrarrikura
1 Kiinga 14:1-20*

1-20 Palunyangka Tjiripumaku katja wiima pika tiñatjarra ngarringi. Tjiripumalu palumpa miitangka watjanu, katja palunya Yayatjalakutu katintjaku, Katutjaku wangka watjalpayilakutu. Tjiripumaku miitangku katja katingu yulparirra, tawunu Tjaluwakutu. Tawunu palula Yayatjanya tjilpirrirra kuru pampa nyinangi. Palumpa waalangka tjarrpaketja Tjiripumaku miita yini watjantjawiya wangkarra tjarrpangu. Katutjalu Yayatjala yurrun yurrunpa tjakultjunu kungka paluru ngalya yananyingka. Yayatjalu alatji watjanu, “Ngalya tjarrpa, Tjiripumakun miita! Nyaakun yiningkun tjukarurrungku watjantjawiya tjarrpangu? Kutjupa nguwanpan wangkarra tjarrpangu. Yara kuyañanta watjalku Tjiripumanya ankula alatji tjakultjunkunytjaku, Katutjakuñu wangka, ‘Mulyarrarringuñanta nyuntupa, nyuntuñin ngayunya Katutjanya wantirra ngayunya nguwanpa kutjarra kutjupa ngaratjunutjangka. Nyuntutarra tjananya tjingapungu palunya kutjarra pulkapungkunytjaku. Yalatji nyuntun palyara ngaratjunkula kuya puntu palyanu, yanangu mirrinytjanirri tjuñangkuya kuya palyantja nguwanpangka wirrili. Palunyangka ngayulu tjananya nyuntupa katjapiñi tjamipiñi mirrintara wiyaliku. Nyuntupa walytja tjuña mirrirrirra wiyarriku.’” Tjilpi Yayatjalu Tjiripumaku miitälakutu alatji piyku watjanu, “Wañalpi,

ngurrakutu malaku arra! Yankulan tawunu walytjangka maa tjarrpanyingka, nyuntupa katja pipirri ngaatjanya wiyarrikuku. Yilta katja ngaatjanya wiyarriku, yulakulpiranyurra.” Tjilpi Yayatjalu Tjiripumaku miitälakutu alatji piyuku watjanu, “Tjiripumanya ankula tjakultjunkunytjaku. Yitjurilaku walytja ngantitja tjuṭangkuya Katutjanya nguwanpa yini Yatjaranya pulkapungkupayi. Palunyatjanu yitjipungkukitjangku ngayulu Katutjalu tjananya paña kutjupakutu wantirriyalku, karru Yupurititjala munkarra, wiyaya ngaangka ngurra walytjangka kutu nyinanytjaku, wiya. Tjiripumaku wangkaya kulira ngayunya wantirra kuya palyaraya nyinanyi.”

Tjiripumaku miitangku wangka palunya kulira malaku katirra tawunungka tjarrpanyingka katja iti palunya wiyarringu, Yayatjalu watjanutjangka.

Tjiripumalu tjananya Yitjurilaku walytja ngantitja tjuṭa kanyiñigi tuuntiyi tuu yiiya. Yalatji tjananya kanyira wiyarringu. Palumpa katjalpi tjanampa mayutju nyinangi, yini Nitapanya.

Mayutju tiña tjuṭa tjanampa yalatji nyinamalpa

15

1 Kiinga 15:1-8,25-34; 16:6-28

¹⁻³⁴ (15:1-8,25-34; 16:6-28) Riyapumanya Tjuutaku walytja ngantitja tjuṭaku mayutju tiña nyinarra wiyarringu. Palunyatjanu

palumpa katja Yapayitjanya mayutju tiña tjanampa nyinangi. Katutjaku tjukarurruwiya nyinarra wiyarringu. Palumpa katjalpi Yiitjanya tjanampa mayutju tiña nyinangi, Tjuutaku walytja ngantitja tjutaku.

Tjiripumanya nyinarra wiyarringutjangka, Nitapanya mayutju tiña tjanampa nyinangi, Yitjurilaku walytja ngantitja tjutaku. Katutjaku tjukarurruwiya nyinangi. Palunyatjanu wati Paatjalu mirri pungkula mayutju tiñalpi tjanampa nyinangi. Paatjalu mayutju tiñarrirra Tjiripumaku walytja tjutaku ngurrira mirri pungkuyinangi. Palunyatjanuya yuwankarra Tjiripumaku walytja tjuta wiyarringu. Paatjanya Katutjaku tjukarurruwiya nyinarra wiyarringu. Palumpa katja Yilayanya mayutju tiñalpi nyinangi, Yitjurilaku walytja ngantitja tjutaku. Wati Tjimirilu Yilayanya mirri pungkula mayutju tiñalpi tjanampa nyinangi. Mayutju tiñarrirra Tjimirilu tjananya Paatjaku walytja tjuta pungkuyinangi, yalatjiya uwankarra wiyarringu. Tjimirinya mayutju tiña nyinanyingka wati Wumirinyangarri tjilirratjarra tjuta ngalya yanu Tjimirinya mirri pungkukitja. Palunyatjanu Tjimirilu waalangka tjarrparra walytjalunku tilira wiyarringu, kutjupa tjutangku mirrintankupayingka. Wumurinya tjanampa mayutju tiñalpi nyinangi Yitjurilaku walytja ngantitja tjutaku. Wumurilu tawunu Tjamiriyanya palyara palula nyinangi. Katutjaku tjukarurruwiya nyinarra Wumurinya wiyarringu. Palumpa katja Yiyapanya mayutju tiña tjanampa nyinangi Yitjurilaku walytja

ngan̄titja tjutaku.

Mayutju tiña tjuṭa tjanampa yalatji nyinamalpa

16

1 Kiinga 15:1-8,25-34; 16:6-28

6-28 (15:1-8,25-34; 16:6-28) Riyapumanya Tjuutaku walytja ngan̄titja tjutaku mayutju tiña nyinarra wiyarringu. Palunyatjanu palumpa katja Yapayitjanya mayutju tiña tjanampa nyinangi. Katutjaku tjukarurruwiya nyinarra wiyarringu. Palumpa katjalpi Yiitjanya tjanampa mayutju tiña nyinangi, Tjuutaku walytja ngan̄titja tjutaku.

Tjiripumanya nyinarra wiyarringutjangka, Nitapanya mayutju tiña tjanampa nyinangi, Yitjurilaku walytja ngan̄titja tjutaku. Katutjaku tjukarurruwiya nyinangi. Palunyatjanu wati Paatjalu mirri pungkula mayutju tiñalpi tjanampa nyinangi. Paatjalu mayutju tiñarirra Tjiripumaku walytja tjutaku ngurrira mirri pungkuyinangi. Palunyatjanuya yuwankarra Tjiripumaku walytja tjuṭa wiyarringu. Paatjanya Katutjaku tjukarurruwiya nyinarra wiyarringu. Palumpa katja Yilayanya mayutju tiñalpi nyinangi, Yitjurilaku walytja ngan̄titja tjutaku. Wati Tjimirilu Yilayanya mirri pungkula mayutju tiñalpi tjanampa nyinangi. Mayutju tiñarirra Tjimirilu tjananya Paatjaku walytja tjuṭa pungkuyinangi, yalatjiya uwankarra wiyarringu. Tjimirinya mayutju tiña nyinanyingka wati Wumirinyangarri

tjilirratjarra tjuta ngalya yanu Tjimirinya mirri pungkukitja. Palunyatjanu Tjimirilu waalangka tjarrparra walytjalunku tilira wiyarringu, kutjupa tjutangku mirrintankupayingka. Wumurinya tjanampa mayutju tiŋalpi nyinangi Yitjurilaku walytja nganṭitja tjutaku. Wumurilu tawunu Tjamiriyanya palyara palula nyinangi. Katutjaku tjukarurruwiya nyinarra Wumurinya wiyarringu. Palumpa katja Yiyapanya mayutju tiŋa tjanampa nyinangi Yitjurilaku walytja nganṭitja tjutaku.

Yilaatjanya nyinamalpa, Katutjaku wangka watjanmalpa

17

1 Kiinga 16:; 17:1-24

Kapi wiyalpi tjanampa ngaraku
1 Kiinga 17:1

¹ Katutjaku wangka watjalpayi yini Yilaatjanya nyinangi. Yitjurilaku walytja nganṭitja tjutaku Yiyapanya mayutju tiŋa nyinanyingka, Yilaatjalu Yiyapanya watjaŋu, “Mayutju Katutjangka mirangka tjukarurruŋanta watjanı. Kuwarri kapilampa wiya punkalku rawalingku. Kul-yarrpalampa wiya ngarriku rawalingku, yiyya maŋkurrrpala. Katutjalu panyapa watjaŋu.”

Kapiwiyangka Katutjalu Yilaatjanya kanalku
1 Kiinga 17:2-16

2-16 Palunyatjanu mayutju Katutjalu Yilaatjanya yalatji watjañu, “Ngurra ngaatjanya wantirra kakarrara yarra! Yankula karru yini Tjiritjala kumpira nyinama!, karru Tjuutanangka kakarrara. Karru Tjiritjanya palyan tjikinmalpa ngurra nyarra palula. Tjulpu tjutangkuntaya miyi katirra yungamalpa, ngayulu tjananya iyaningka.”

Palunyatjanu Yilaatjanya ankula karru Tjiritjangka palya nyinangi. Mungawinkikarrangu mungawinkingka tjulpu tjutangku miyi an kuka ngalya katirra ungkupayi, mungarrtjikarrangu mungarrtjitarra. Rawa nyinarra kapi wi-yarringu.

Palunyatjanu Katutjalu Yilaatjala alatji watjañu, “Tawunu Tjiyapatjakutu maa yarra!, tawunu Tjayitanangka yila ngaranyi. Palunya ngurrarangkunta pałtjanmalpa, minyma walukutangku, ngayuluña minyma panyapa nintiñingga.” Palunyatjanu Yilaatjanya pakara yanu ngurra Tjirapatjalakutu. Yankula tawunu palula yila nguwanpa nyinangi. Paluru nyangu minyma walukuta, waru kutjalkitjangku kurralpa mantjiyinanyingka. Nyakula watjanu, “Kapitjirratjaña ngalya yanutjangka, ankula mantjira ngalya kat!” Maa yananyingka, kutu watjañu, “Mangarrițarratju ngalya kat!” Minyma paluru watjañu, “Mayutju Katutjangka mirangka tjukarurrungkuñanta watjañi puriitiwiyanä nyinanyi. Pulawu yulpu kutju wiima ngarrinyi, tjira wiimapatuñarra. Pulawu palunya kutjalkitjangku waru ngayulu mantjini.

Mayi palunya kutjulitju rungkara ngalkula paltjarringkula wiyarriku, katjararralitju.”

Yilaatjalu watjañu, “Mangarriwiyangka wiyarrikitjangku puñu kulintjawiya, ngayuku kutju mangarri wiima rungkara kutjara ngalya kati! Palunyatjanu ngantingku rungkara kutjala!, nyupali ngalkukitjangku. Mayutju Katutjaku wangkañanta yalatji tjakultjunanyi. Turaama palula pulawu palunya kutu ngarrimalpa, wiyarrinytjawiya. Paatula palula tjira kutu ngarrimalpa, wiyarrinytjawiya. Ngula kutju pulawu an tjira wiyarriku. Ngayulu Katutjanya kapiku tlapintjala nganti, palunyatjanu pulawu an tjira wiyarriku.”

Walukuta paluru parrpatu yankula kutjara mantjira ngalya katingu, Yilaatjalu watjañutjangka. Wangka palunya Yilaatjalu watjañutja iltarringu. Pulawu yulpu an tjira palunya kutu ngarringi, wiyarrirkunytjawiya. Katutjalura rawangku pulawu an tjiratjarrangku yanťayaňtańgingi walukuta palunya.

Waľukutaku katja kanarriku

1 Kiinga 17:17-24

17-24 Ngula, minyma waľukuta palumpa katja pika puntutjarra ngarrirra wiyarringu. Minyma paluru yularra Yilaatjalakutu yankula watjañu, “Nyaakun ngaangka ngalya yankula nyinanyi? Nyuntu nyinanyingka Katutjalunu tjinguru kuliní kuyaňa palyaňutjangka. Palunyatjanu ngayunyanji yitjipungamara palunyatjanu katjalpitju wiyaňu.”

Yilaatjalu watjañu, “Nyuntupa katja palatjanı yuwa!, yampura kanyintjanya.” Yilaatjalu mantjira katirra waalangka katu katurrirra palumpa ngurra yintjamingga ngarritjunu. Ngarritjunkula Katutjanya yalatji tjapinu, “Mayutju Katutja, nyaakun pipirri ngaatjanya yiluntanu? Wałukutaku katja kutjupilkura nyinanyi ngaatjanya. Paluruñi kutu yantayantalpayi, kanaranu kanyimara.”

Ula palula Yilaatjanya wałungarakatirra Katutjanya yalatjingku tjapinu, “Mayutju Katutja, ula ngaatjanyara kanala!” Yalatji tjirripalangara wałungarakatirra Katutjanya tjapiningga, Katutjalu Yilaatjaku wangka kulira ula palunya kanañu. Kanarringanyingka yampura tjarukatirra yungu palumpa maama. Wałukuta palunya watjañu, “Nyawa!, kanalpinku katja nyinanyi.” Minyma paluru pukularrirra Yilaatjalakutu watjañu, “Yilta nyuntu Katutjakunu, palumpa wangka yilta nyuntu watjalpayi.”

Yilaatjalu Paalaku waarrkana tjananya kunṭalyanku

18

1 Kiinga 18:1-46

Paalalu waru tilintjakuya putu tjapinmalpa

1 Kiinga 18:1-35

¹⁻³⁵ Ngurra tjuṭawana kapiwiya ngarangi yiyya tjirripala. Palunyangka mayutju Katutjalu Yilaatjala yalatji watjañu, “Yankula mayutju tiña Yiyapala ngarala wangka!, ngayulu

kapi nyurrampa kuwarri wantirriyaningka." Palunyangka Yilaatjanya yulparirrawana yanu. Yankula ngururrpa mayutju Yiyapaku waarrkana Wupatayanya tjungurringu. Wangkarrapula Wupatayalu yankula mayutju Yiyapanya altingu, Yilaatjanya ngalyankula wangkanytjaku.

Mayutju Yiyapalu ngalya yankula Yilaatjanya alatji watjañu, "Nyuntulanyatjun yurrnyunu, kapiwiya nyinanytjaku." Yilaatjalu watjañu, "Wiya, mungutjana. Nyupalipulan paapararangku kuya palyaningitjangka. Katutjaku wangkapulan wantirra Katutjanya nguwanpa, Paalanyalpipulan pulkapungangitjangka. Palunyatjanu nyurranya Katutjalu kapi wiya yunganyi, tjukarurrunyurra nyinanytjawiyangka." Yilaatjalu Yiyapala alatji kutu watjañingi, "Yañangu tjuta tjananya Yitjurilaku waltyja ngantitja tjuta watjala!, yankula tjungurrinytjaku puli yini Kamilangka. Paalaku tulku kanyilpayi tjutatarra tjananya altirra kati!, yankulaya palula tjungurrinytjaku. Tjanaya tjuta nyinanyi, puu yantatan pipitiyipala. Yaltirra tjananya kati puli palulakutu! Nyuntupa miita Tjiitjapilanya tjanampa yunyparringanyi palumpa waltyja tjutaku. Paluru tjananya yantayançtalpayi."

Mayutju Yiyapalu tjananya altinyingka ankulaya puli Kamilala tjungurringu, Yitjurilaku waltyja ngantitja tjuta, Paalaku waarrkana tjutatarra. Palunyatjanu tjananya ankula Yilaatjalu alatji tjapiñu, "Ngananyanyurra mayutju tiña pulkapungukitjangku puñu

kuliñi? Ngananyalampa mayutju tiña nyinanyi?, tjinguru Paalanya?, tjinguru Katutjanya? Katutjanya mayutju tiñalampa nyinanyingka, Katutjanyalpinyurra pulkapungkunytjaku. Tjinguru Paalanya mayutju tiñalampa nyinanyingka, Paalanyanyurra pulkapungkunytjaku. Ngananyalampa mayutju tiña nyinanyi?, Paalanya tjinguru Katutjanya.” Yalatji tjananya tjapiningitjangka wangkanytjawiyaya ngarala wanìngi. Yilaatjalu tjananya kutu watjañu, “Katutjaku wangka watjalpayi ngayulu kutju ngaranyi, kanya Paalaku wangka watjalpayi tjutalingkunyurra ngarala waninyi. Palunyangka Paalaku waarrkana tjutangkunyurra puluka tjawirrilyi kutju mirri pungkula yitjilinkula waru kurrkalpangka tjunkunytjaku, tilintjawiyangku. Palunya nguwanpa ngayulu puluka kutju mirri pungkula yitjilinkula waru kurrkalpangka tjunku. Yalatjiya Paalaku waarrkana tjutangku tjunkula tjapila, waru tilintjaku! Ngayuluñarrana tjawirrilyi tjunkula mayutju Katutjanya tjapilku, waru tilintjaku. Tjinguru Paalalu nyurrampa waru tilikku, ngananya kulikku paluru yulta mayutju tiña nyinanyi. Tjinguru Katutjalu waru ngayuku tilikku, ngananya kulikku paluru yulta mayutju tiñalampa nyinanyi.”

Yañangu tjutangkuya Yilaatjaku wangka kulira yunyparringu. Palunyatjanu tjananya Yilaatjalu watjañu, “Paalaku waarrkana tjutangkunyurra tjawirrilyi tjunkula yurrumpangku tjapintjaku Paalalu waru tilintjaku.” Tjawirrilyi pungkulaya

yitjilinkula waru kurrkalpangka tjunkula puṭuya tjutangara tjapiṇu tilintjaku. Kalala tjanampa tilirrinytjawiyangka Yilaatjalu tjananya ngunytji alatji watjaṇu, “Kutuya tjapila! Tjinguru Paalanya tii pulkara tjikintjatjanu yanu. Tjinguru kunpu ngarrinyi kulintjawiya. Mirrarraya kanala! Tjinguru yanku ngarrinyi, kulintjawiya.” Puṭuya tjapira tjuuḷangkalpiyanku kuntanu walytjangku yalipiri tjuntaṭarra. Yalatjiya ngurrka yintirra tjutangara tjapira mungarrtjirringu.

Palunyatjanu tjananya Yilaatjalu watjanu, yanangu tjuṭa yilarrirra nyakunytjaku. Katutjaku uulta nguwanpaya yanangu tjutangku yirriṭi palyara wantingu. Palulanguru uulta palunya ngarala kuyakuyarringu. Tjanaya nyanganyingka Yilaatjalu puli tjuṭa mantjira tjunangi. Uulta palyalpi ngarangi. Yalatji palyara wiyara tjawara wananiŋgilpi kapi ngaṭiwana ngarrinytjaku. Waru palunya kurrkalpa mantjira uultangka katuwana tjunkula wanauṇu. Kuka tjawirriliyi yitjilinkula kurrkalpangka tjunu. Watjaṇu tjananya turaama tjutangka tjutira ngalya katinytjaku, ngalya katirraya tjutintjaku kurrkalpangka kukangka. Yalatjiya turaama tjutangka tjirripalangara katira kapi tiṇa ngalya katirra yintiningga. Kuka an kurrkalpa wiita ngarangi. Nganti palunya yurrunpaya tjawara wantingutjangka, kapi palunya yintirra katurringu.

Katutjalura waru tililku
1 Kiinga 18:36-39

36-39 Palunyangka uulta palula ila ngarala Yilaatjalu Katutjanya alatji tjapiṇu, “Mayutju Katutja. Nyuntu tjanampa mayutju tiṇa nyinangi Yipuramakungarriku tjanampa, Yatjikaku walytja tjutaku, Tjikupaku walytja tjutakuṭarra. Tjanampaṇu walytja ngantitja tjutala kuwarri nyinanyi. Kutjupa tjutaya ngaangka nyinanyi nyuntupa wiya tjukarurru nyinanyi, kanya ngayulu nyuntunya kulini. Yipuramaku ngantitja tjuta tjananya kuwarri nintila! Waru ngaatja tilila!, tjanaya tjukarurrungku nyakula kulintjaku, nyuntu yilta mayutju tiṇalampa nyinanyi. Nintila tjananya!, ngayulu nyuntupa wangkawana yaltirra tjananya ngaratjunkunytjaku, tjana nyakunytjaku, nyuntu warutjarrangku tiliṇingka. Tjanaya kulintjaku nyuntunin alatji watjaṇutjangka, ‘Yilaatja. Waru an kuka tililwiyangku nyuntu tjunkula ngayunya tjapila tilintjaku!’ ”

Yilaatjalu yalatji Katutjanya piyuku tjapiṇu, “Yaŋangu ngaa tjuta tjananya nintilkitjangku nyuntu kurralpa tilila!, nyakulaya tjukarurrungku kulintjaku, nyuntu mayutju tiṇalampatju nyinanyi. Yalatji tjananya nintila!, yaltururringkula kanyintjakitjangku yaŋangu tjuta.”

Palunyangka Katutjalu waru katunguru waṇingu. Waru paluru uulta pulinguru palyaṇutja winki kamparra wiyanu, kuka tjawirrilyitarra. Ngati palula kapi an paṇa kamparra tjunparringu. Yaŋangu tjutaya nyakula ngulurrirra waṭungarala alatjingku

Katutjanya pul_kapungu, “Katutjanya mularrpa mayutju ti_na kutjulampa nyinanyi.”

Paalaku waarrkanaya mirri pungkuyinamalpa
1 Kiinga 18:40

⁴⁰ Palunyangka tjananya Yilaatjalu watjanu, “Paalaku wangka watjalpayi tjuta tjananya uwankarra witira kanyila!, palumpa waarrkana tjuta.” Palunyatjanu tjananya Yilaatjalungarri katingu karru yini Kitjunakutu. Paluru tjana katirra tjananya Paalaku waarrkana uwankarra mirri pungkuyinangi.

Kapi tjanampa Katutjalu wantirriyalku
1 Kiinga 18:41-46

⁴¹⁻⁴⁶ Palunyangka Yilaatjalu mayutju ti_na Yiyapangka alatji watjanu, “Pakara yankula ngalkula! Kuwarri kapi ti_nangkulanya pungamalpa. Kulinina kapingku kutu punganyi.” Wangka palunya watjanu yutuwari ngaranytjawiyangka. Mayutju Yiyapanya yankula ilangku mayi ngalkuningka, Yilaatjanyapula palumpa waarrkana puli Kamilangka kalparra nyinangi. Yilaatjanya pupakatirra kata mu_ti kutjarrangka ngururipa tjunkula Katutjanya kapiku tjapiningi. Palumpa waarrkana witulkitjangku paluru alatji watjanu, “Pulingka katu kalparra wilurarra nyawa!, utuwariku.” Waarrkana paluru kalparra putu nyakula piyuku ngalya tjarukatirra Yilaatjala alatji tjakultjunu, “Wiya, pu_tuna nyangu.” Tjikitjipalangara paluru kalparra putu nyangu, Yilaatjalu iyanutjangka. Palunyatjanu piyuku iyanu. Waarrkana paluru kalparra

nyakula ngalya tjarukatirra tjakultjunu, “Nyanguṇa utuwari, tjukutjuku, yurunguru mara kapuṭu nguwanpa pakaṇingka.” Palunyatjanu Yilaatjalu waarrkana palunya alatji iyanu, “Mayutju tiṇanya Yiyapanya ankula tjakultjurra!, paakingka kalparra ngurrakutu wala ankunytjaku, kalyu tiṇangku angatjunkupayingkamarra.”

Utuwari tiṇarringu tjanampa walpa tina wangkangi. Palunyatjanu kapi tiṇangku tjananya pungkula wanaṇu. Yiyapanya paakingka kalparra ngurra Tjitjirilakutu yananyingka, Yilaatjanya paakingka yurrunpa tjina tjalkalungkuyinangi ngurra Tjitjirilakutu, Katutjalu palunya katiyanangitjangka.

Yilaatjanya puli Tjaniyakutu ankula nyinamalpa

19

1 Kiinga 19:1-21

Mirri pungkutjipingkamarra Yilaatjanya tjalkalungku

1 Kiinga 19:1-8

1-8 Ngurrakutu ankula mayutju Yiyapalu palumpa miiṭangka Tjiitjapilala tjakultjunu, Yilaatjalungarri Paalaku waarrkana tjuta mirri pungutjangka, Paalaku wangka watjalpayi tjuta. Palunyatjanu Tjiitjapilalu mirrpaṇarrirra waarrkana iyanu Yilaatjangka alatji tjakultjunkunytjaku, “Nyurrangarri tjananya Paalaku waarrkana tjuta mirri pungutjangka, ngayululpiṇanta palunya

nguwanpa ngaparrtjilu mirri pungku. Pungkukitjangkunanta tjukarurru watjanı, tjintu kutjupangkan mirri ngarriku. Mirri pungkuwiyangkuñanta wantintytjala palyanıya mayutju ilkari ngurrara tjutangku mirri pungkunytjaku. Yuwa, yiltalatjunta mirri pungku, wantiwiyangku.”

Kulira Yilaatjalu ngulurringkula palumpa waarrkana altirra malpararrapula anu tawunu Piitjipakutu. Ngurra palula waarrkana nyinatjunkula wantirra Yilaatjanya kutjulpi wayinta anu ngurra kapi yukiri kukawiyawana yulparirralku. Yankula wilytjangka watjilpa nyinarra alatji Katutjangka tjapiñu, “Mayutju Katutja. Kutjupa tjutangkuniya mirri pungkutjipingka ngayulu putu kulini.” Palunyatjanu paluru Katutjanya alatji watjanu, “Ngayunyalpini mirrintarra! Watjilpana nyinarra yunytjurringanyi mirrirrikitja.” Wilytja palula paluru ngarrikatirra ankurringu.

Palunyangka ilkari ngurrarangku kanara yalatji watjanu, “Pakara ngalkula!” Kanarrirra nyangu puriiti kutjukamu paatula kapitjarra ngarangi. Pakara ngalkura tjikira ngarrikatirra yankurringu.

Katutjaku waarrkana paluru ilkari ngurrarangku piyuku kanara watjanu, “Pakara ngalkula!, ngururrpa mayitjirratja punkara wi-yarritjipingka.” Palunyangka Yilaatjalu pakara piyuku ngalkunu. Ngalkula tjikira yulparirra wañma yanu puli Tjaniyalakutu, ngururrpa piyuku ngalkula tjikintjawiya. Paluru rawa

yanangi ngurra palulakutu, Purayitiyi tjikitji-pala.

Puli Tjaniyala Yilaatjanya nyinamalpa
1 Kiinga 19:9-18

9-18 Puli Tjaniyala Yilaatjanya kulpingka tjarrparra ngarirra yankurringu, mungangka. Ngurra palula mayutju Katutjalu Yilaatjanya yalatji tjapiṇu, “Yilaatja. Nyaakitjan ngaangka nyinanyi?” Yilaatjalu alatji watjaṇu, “Katutja. Nyuntu mayutju tiṇatjun nyinanyi. Nyuntupa kutjuṇangku waarrkana tjukarurru nyinapayi. Kutjupa tjutaya Yitjurilaku walytja ngantija tjuta wiyawana nyinanyi. Nyuntupa wangka wantirraya nyuntupa uulta tjutangka wiyaya nyuntunya pulkapunganyi. Nyuntupa uulta tjutaya kilytjunktankula wiyalpayi. Nyuntupa wangka watjalpayi kutjupa tjuta tjananya tjana pungkula wiyaṇu. Ngayunya kutjulpiṇa kana nyinanyi. Kuwarriya yunytjurringanyi ngayunyalpiṇiya mirri pungkunytjakitja.”

Katutjalu kulira Yilaatjala watjaṇu, “Kulpinguru pakara maa yarra! Pulingka kalparra ngara!, ngayulu nyuntula tjungurrinytjaku.” Pakara yankukitjangka Katutjalu walpa tiṇa wantirriyanu. Walpa paluru puli tjuta rungkara kilytjukilytjuntanu. Yalatji walpa tiṇa rungkaṇgingitjangka Yilaatjalu puṭu kulinu Katutjala tjungurrikitjangku. Yilaatjalu yalatji puṭu kulinu, “Tjinguru Katutjanya walpa tiṇawana tjungu ilarringanyi, tjinguru wiya.” Walpa wiyarringutjangka paṇa pirrtjipirrtjingu. Pirrtjipirrtjinyingka Yilaatjalu

pu̯u kuli̯u Katutjala tjungurrikitjangku. “Tjinguru pa̯a pirrtjinyingka Katutjanyani ilarringanyi, tjinguru wiya.”

Pa̯a pirrtjipirrtjirra wiyarringutjangka waru tinalpi kamparra wanañingi. Kamparra wanañingitjangka Yilaatjalu pu̯u kuli̯u Katutjala tjungurrikitjangku. “Tjinguru waru wanañingitjawana Katutjanyani ilarringanyi, tjinguru wiya.”

Waru kamparra wiyarringutjangka Yilaatjalu kuli̯u Katutjanya wangkanyingka. Wangka palunya kulira Yilaatjalu kuutangka yunpa tjutura kulpi yalakutu ankula ngarangi. Ngarala wangka alatji kuli̯u, “Yilaatja. Nyaakitan ngaangka nyinanyi?” Yilaatjalu watjanu, “Katutja. Nyuntu mayutju tiñatjun nyinanyi. Nyuntupa kutjunanku tjukarurru waarrkana nyinapayi. Kutjupa tjutaya Yitjurilaku walytja ngantitja tju̯ta wiyawana nyinanyi. Nyuntupa wangka wantirraya nyuntupa uulta tjutangka wiyaya nyuntunya pulkapunganyi. Nyuntupa uulta tjutaya kilytjunktankula wiyalpayi. Nyuntupa wangka watjalpayi kutjupa tju̯ta tjananya tjana pungkula wiyanu. Ngayunya kutjulpiña kana nyinanyi. Kuwarriya yunytjurringanyi ngayunyalpiñiya mirri pungkunytjakitja.”

Katutjalu Yilaatjala piyuku alatji watjanu, “Tawunu Tamatjakatjangka ila ngurra kuya kapiwiya ngaranyi. Ngurra palulakutu ankula nyinama! Palulanguru yarra tawunu Tamatjakatjalakutu! Tjarrparra ankula wati Yatjiyilanya tjira intira mayutju tiña tjanampa nyinatjurma!, Tjiriyanya ngurrara

tjuṭaku. Palunyatjanu ankula Tjiiyuwanya nyawa, tjilpi Nimitjiku katja! Wati palula tjira intira mayutju nyinatjurma!, Yitjurilaku waltyja nganṭitja tjuṭaku mayutju tiṇalpi nyinanytjaku. Wati kutjupatarrha Yilatjanya yankula tjira intila!, ngayuku wangka watjalpayi nyinanytjaku. Paluru wati Tjapataku katja nyinanyi. Paluru nyinaku wangka watjalpayi nyuntu wiyarringanyingka nganti. Mayutju palunya tjuṭangku kuyarringkupayi tjuṭa tjananya iluntanku. Kutjupa tjuṭa tjananya mirri pungkuwiyangku wantiku. Ngayulu Katutjalu tjananya Yitjurilaku waltyja nganṭitja tjuṭa yaṇtayaṇtara kanyilku ngayuku tjana tjukarurru nyinanyingka. Kanalpiya nyinamalpa tjuṭalingku tjapan tjawutjuna. Tjanaya Paalaku ngurrpa nyinanyi, ngayukuya tjukarurru nyinanyi.”

*Yilatjangka tjira intilku Katutjaku wangka
watjalpayilpi nyinanytjaku*

1 Kiunga 19:19-21

19-21 Palunyatjanu Yilaatjalu ankula wati Yilatjanya nyangu, puluka kutjarangku yayina katiyananyingka, pana kaanaku yulpurinkupayitjarra. Yalatji waarrkarryingka Yilaatjalu palumpa kuuta waṭawara irrilytjunkula wanara Yilatjaku yalipiringkalpi tjunu, palumpa waarrkana nyinanytjaku. Kututja, Katutjaku wangka watjalpayingku mayutju kutjupa Katutjaku nyinatjunkukitjangku kuuta waltyja irrilytjunkula alipiringka tjunkupayi, Katutjaku

wangka watjalpayi kuuta palunyatjarralpi Katutjakuṇu ngangkaritjarra nyinanytjaku. Palunyatjanu Yilatjalu Katutjaku wangka watjalpayi nyinakitjangku kulira puluka palunya kutjarra wantirra Yilaatjangka alatji watjanu, “Wanyuna ankula paapakamu maamangka tjakultjunku, ngayulu pulanya nyunytjura tjunguli wantirra yankukitjangku.” Yilaatjalu wati Yilatjangka alatji watjanu, “Palya, yankula pulanya maa watjara wantikati!, nyuntupa paapa an nyuntupa maama yankukitjangku kulira.” Palunyatjanu Yilatjalu palumpa puluka kutjarra mirri pungkula kutjara tjanampa yungu, palumpa waltya tjutaku. Palunyatjanu Yilatjaku waarrkana nintirrikitja tjungupula yanangi.

Niputjaku kaana mantjilku

21

1 Kiinga 21:1-27; 22:1-40

*Yiyapanya yunytjurriku Niputjaku kaanaku
1 Kiinga 21:1-7*

¹⁻⁷ Mayutju Yiyapaku ngurrangka ila wati Niputjaku kaana palya kiripitjitarra ngarangi. Yiyapalu kaana kutjupa tjuṭa kanyilpayi. Kaana palunya rawangku nyakula yunytjurripayi mantjilkitja. Yunytjurringkula Niputjanya ankula alatjingku tjapiṇu, “Nyuntupa kaana payimilalkitjaṇa ngalyanu. Palyaṇa payimilalku? Ngayuku ngurrangka ila ngaranyi. Kanyira yukiri kutjupa kutjupa pakaltjingalkitjangkuṇa kuliṇi. Tjingu-run kaana kutjupaku nyakula unytjurringanyi,

kaana palunyananta payimilara yungku, kaana ngaatjanya kanyilkitjangku.” Niputjalu watjanu, “Kaana ngaatjanya ngayuku paapangku an tjamungku kanyilpayi. Palunyatjanuña kanyini. Katutjakunu luwulampa yalatji ngaranyingka ngayuluña kutu kanyintjaku, Katutjanyatju kuyarringkupayingkatju. Palunyangka wiyananta tjalamilalku kaana ngaatjanya ngayuku tjamukunu. Kaana kutjupa kanyilkitja wiyanan yunytjurringanyi.”

Yiyapalu kulira watjilarrirra ngurrakutu yanu malaku, Niputjaku kuyarringkula. Mayi ngalkuntjawiya piitangka kutu ngarringi, kaana palunyatjirratja. Yiyapalu kaanaku putu tjapiningitjangka Tjiitjapilalu palumpa miiṭangku kulira Yiyapalakutu ankula watjanu, “Watjilpa ngarrinytjawiya pakala!, yunypa nyina!, ngayuluñanku Niputjaku kaana mantjilku.”

*Niputjanya mungutjaya mirri pungku
1 Kiunga 21:8-16*

8-16 Tjitjirilanya ngurrara mayutju tjuṭakutu Tjiitjapilalu piipa tjuta wakara wantirriyanu, yara alatjitarra. “Yañangu tjuta nyurrangarri watjala!, ngula tjungurringkula ngalkura tjikira yunyparrinytjaku. Ngalkuranyurra tjikira Niputjanya yankula mantjira katinytjaku, ngunyntji mayutju nguwanpa nyinatjunkukitjangku. Yurrunpangku pulanya nyurrangarri wati kutjarra tjingapuwa!, Niputjanyapula ngunytjilyinkunytjaku, yañangu kutjupa tjuṭangka mirangka. Alatjipula

Niputjanya watjalku, ‘Katutjanyatarra mayutju Yiyapanya nyuntu Niputjalu kulira wantipayi.’ Palunyangka tjutangkunyurra Niputjanya witira katirra pulitjarrangku rungkara mirrintankunytjaku.” Yitjurilaku walytja ngantitja tjutangku yanangu Katutjanya panypurangkupayinya kututja rungkara mirrintankupayi.

Tjiitjapilalu piipa palunya tjuta wakara tjanampa wantirriyanutjangka mayutju palunya ngurrara tjutangku Niputjanya yanangu kutjupa tjutatarra yaltirra tjungunu tjananya. Yalatjiya yanangu tjuta tjungurriira ngalkula tjikira nyinanyingka, paluru kutjarrangku ngunytjilyira Niputjanya ngunytji watjañu. Yalatjipula ngunytjilyinutjangkaya yanangu tjutangkuya Niputjanya witira katirra pulitjarrangku rungkara mirrintanu. Palunyatjanu mayutju palunya tjutangku Tjiitjapilakutu waarrkana wantirriyanu yara yalatji tjakultjunkunytjaku, “Wati Niputjanyaya pulingka rungkara yiluntanu.” Kungka Tjiitjapilalu tjakultjunkunytja kulira yunyparringu. Paluru mayutju Yiyapalakutu ankula tjakultjunu, “Niputjanyaya yiluntanu. Palunyatjanu kaana palunya nyuntu yankula kanyinma!” Palunyangka Yiyapalu tjananya ankula waarrkana tjuta, ila nyinanytja tjuta watjañu kanyintjaku, Niputjakuñu kaana.

*Yilaatjalu Yiyapanya watjalku mirrirrinjtjaku
1 Kiunga 21:17-27*

17-27 Mayutju Katutjalu Yilaatjanya palumpa wangka watjalpayinya alatji watjañu, “Yankula mayutju Yiyapanya nyawa!, Niputjaku kaana mulyañangku kanyiñingka. Yankula kaana palula nyakula alatjira tjakultjurra! ‘Wati ngaa ngurrara tjana mirri pungutjangka palumpa kaana wiyan mulyañangku kanyintjaku. Ngayulu Katutjaluñanta Yiyapanya alatji tjukarurru watjañi. Ngurra panyapangka Niputjanya wiyarringu, ngurrka papa tjutangku anytjuñu, nyuntunyañarralpi anytjulku.’” Yilaatjalu ankula wangka palunya mayutju Yiyapangka tjakultjunu. Wangka kutjupañarra palulakutura alatji watjañu Katutjakunu wangka, “Nyuntu kutu Katutjaku wangka wantirra kuya palyalpayi. Palunyatjanu nyuntupa walytjapitarrha tjananya Katutjalu mirri pungkula wiyalku. Nyuntupa miita Tjiitjapilanyañarranä mirri pungku. Tawunu Tjitjirilangka palunya mirri ngarrinyingka papa tjutangkulpiya ngalku. Nyuntupa walytja kutjupa tjuta ngurra wañma mirri ngarirra wañinytjala tjulpu tjutangku ngalku.” Mayutju Yiyapalu wangka palunya kulira ngulurrirra mantarra walytja palumpantu dintarrpungangi. Mayi an kuka ngalkuwyangku wantirra watjilpa nyinangi. Yitjurilaku walytja ngantitja tjutangku kututja mantarra walytja watjilarringkula dintarrpungkupayi.

22

Pika wakañutjatjanu Yiyapanya mirrirrirra

wiyarringku

1 Kiinga 22:1-40

1-40 Mayutju tiṇa Yiitjanya tjanampa Tjuutaku walytja ngantitja tjutaku nyinarra mirriringu. Palunyatjanu palumpa katja Tjiyutjapatanya mayutju tiṇalpi tjanampa nyinangi.

Mayutju Yiyapa paluru ankula mayutju Tjiyutjapatanya tjapiṇu, “Palyala tjungu yankuku tawunu Ramutjalakutu pikangku pungkukitja?” Tjiyutjapatalu kulira yunyparrirra watjaṇu, “Katutjaku wangka watjalpayi tjutanya ngali tjananya tjapilkwarri.” Katutjaku wangkapayi tjanaya tjutalingku nyinapayi, puu yantaṭa. Yiyapalu tjananya tjungura tjapiṇu, “Palyalatju tjananya ankula Tjiriyanya ngurrara tjuta mirri pungkula, kutjupa tjuta ngulutjingaralatju wantirriyalku?, tawunu Ramutjanya kanyilkitjangku.” Watjaṇuya, “Yuwa. Yankula tjananya nyurrangarri palya pungku, mayutju Katutjalu nyurranya kanṭilyanku.” Tjiyutjapatalu Yiyapanya tjapiṇu Katutjaku wangka watjalpayi kutjupa yaltirra ngalya katintjaku kutu tjapintjakitjangku.

Yiyapalu watjaṇu, “Katutjaku wangka watjalpayi yini Makayanya nyinanyi. Wiyanā palunya tjapilku, yara kuyakuya kutjuṇi tjakultjunkupayi.” Tjiyutjapatalu watjaṇu Makayanya altirra ngalya katintjaku. Paluru ngalya yankula ngaranytjala, wangka panyapapula tjapiṇu, yurruntitja tjuta tjapiṇutja nguwanpa. Kanya wati Yiyapaku waarrkanangku Makayanya tjingapungu, “Nyuntu wangka yurruntitja tjutangku watjaṇingitja nguwanpa Yiyapalara watjala!”

Palunyatjanu Makayalu pulanya nguntilyira alatji watjañu, "Palyanyurra ankula tjananya mirri pungku." Yiyapalu kulira alatji marrkuñu, "Wiya nyuntu ngalinya nguntilyinkunytjaku." Palunyatjanu Makayalu yalatji tjukarurru watjañu, "Tjukurrmankulana nyurrranya nyangu Yitjurilaku waltyja ngantitja tjuta tjilirratjarra tjuta. Tjanaya parra ngarala yulangi mayutju wiyarringutjangka." Makayalu pulanya yara watjañu yalatji, "Katutjaku wangka watjalpayi tjutangku nyupalinya ngunytji watjañu." Paluru kutjarra yara kulira Makayaku ngurkurringu.

Wangka palunya kulintjawiyaya Yiyapanya Tjiyutjapatanya tjilirratjarra tjutañarra, tawunu Ramutjakutu tjungu yanu pika pungkula tawunu palunya tjulyantjakitja. Yiyapanya mantarra kuyakuyangka tjarrparra paakingka yanu pika pungkukitja. Palunyatjanuya Tjiriyanya ngurrara tjutangku Yiyapanya kutju yiluntankukitjangku puñu nuuwimilaraya wantingu. Wati Tjiriyanya ngurrarangku puwanarratjarrangku Yiyapanya kutjupakutjura kulira kultu wakanu.

Yiyapaku paaki waarrkanangku katiyanangi. Paluru katirra ngaratjunu wanma nguwanpa kutjupa tjutangkuyanku pika pungkunytjala. Paakingka Yiyapanya pika yawarratjarra witira ngarala mungarrtjilpi ilungu. Pikangkuyanku kutu pungkupayi. Palunyatjanu Yiyapanya ngurra waltyjakutu mirri katirra tjunutjunu tawunu Tjamiriyangka. Yiyapaku paaki Yiyapanya ngurkatjarraya katirra ngaratjunu Tjamiriyangka kapingka. Palunyatjanuya papa

tjuŋangkulpi Yiyapanya ngurrka yanytjuŋningi,
mayutju Katutjalu panyapa watjaŋutjangka.

Luritja Bible

The New Testament and selected portions of the Old Testament in the Luritja language of Australia

copyright © 2006 Bible Society of Australia

Language: Luritja (Pintupi-Luritja)

Dialect: Luritja

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-01-06

PDF generated using Haiola and XeLaTeX on 11 Nov 2022 from source files dated 7 Jan 2020

87b44b8a-66cc-5a79-8b77-3942a674d88b